

Uunga siunnersuut: Imigassaq pillugu Inatsisartut inatsisissaat nr. xx, xx. xxx 2018 -imeersoq
(Peqqissutsimut Naalakkersuisoq)

Akissuteqaat

Pingajussaaneenera

Ilaqutariinnermut Peqqissutsimullu Ataatsimiititaliap sulineranut ilassutillu isumaliutissiisummik tunniussinera pillugu Naalakkersuisut qutsavigaat.

Ilaqutariinnermut Peqqissutsimullu Ataatsimiititaliap oqaaseqaatai Naalakkersuisunit tusaatissatut tiguneqarput, taamaalilluni illoqarfinni nunaqarfinnilu arfininngornikkut imigassamik tuniniaasarnermut ammasarfiit assigiilerniassammata, tassa nal. 10-14. Ilaqutariinnermut Peqqissutsimullu Ataatsimiititaliap isumaliutissiisummi kissaataat eqqortinniarlugu aappassaaneerinninnerup kingorna Naalakkersuisut naliliipput imigassamik aalakoornartortalinnik pilerisaaneq pillugu siunnersuut erseqqissarneqarnerusariaqartoq. Taamaattumik aalajangersakkami pilerisaarinissamik inerteqqummi suliffeqarfiup ilisarnaataa ilaatinneqanngitsoq erseqqissumik allanneqarluni.

Isumaliutissiisummi aamma ilassutitut isumaliutissiisummi kissaatitut saqqummiunneqarpoq Naalakkersuisut Inatsisartut inatsisissaattut inatsisitut siunnersuut kukkunerisussagaat. Taamaattumik Naalakkersuisut inatsisissatut siunnersuutip qallunaatuua teknikikkut aaqqiissuteqarfigaat kiisalu inatsisissatut siunnersuutip kalaallisuaa teknikikkut oqaatsitigullu aaqqiissuteqarfialugu.

Imigassaq pillugu inatsit nutaaq meeqqatta pitsaanerusemik siunissaqalernissaannut alloriarneruvoq annertoq pingaarutilillu. Sulinerli matumani uninngilaq, inatsisip akuersissutigineqarnerata kingorna suliassat arlallit aallartisarneqassapput.

Inatsit pissutigalugu pitsaaliulluni sulineq pillugu pisiniarfiit imigassamillu sassaalliisarfiit suleqatigiinnerat nakussatsinneqassaaq. Paasisitsiniaaneq pillugu suleqatigiittoqassaaq Naalakkersuisullu sulisut imigassamik tuniniaanermik sassaalliinermillu suliaqartartut akisussaassuseqartumik sassaalliisarnissamik ilinniartitsinermik neqerooruteqartalissallutik.

Imigassaq pillugu akuersissummik kommunalbestyrelsimut qinnuteqartut tamarmik imigassaq pillugu politikiliornissamut najoqqutassiunneqassapput.

Tamatuma saniatigut, kommunit suleqatigalugit, imigassaq pillugu akuersissutinut nalunaarutit ininullu piumasaqaatit nutartissavakka. Taamatuttaaq inatsimmik eqqortitsineq, nakkutilliineq pitsaaliullunilu sulineq pillugu Naalakkersuisut, politiit kommunillu akornanni suleqatigiinneq nakussatsissavara.

Aamma nalunaarummi imigassanik aalakoornartortalinnik assiaqusersuinnermut piumasagaatit pillugit aalajangersaanermik suliaqarnermi pisiniarfiit akuliutitikkusuppakka. Nalunaarummi pisiniarfinni angisuuni mikisunilu pissutsit innimigineqassapput.

Arlaleriarlunga oqareernittut imigassaq pillugu ajornartorsiutit aaqqissagutsigit suliniutit assigiinngitsorpassuit pisariaqartippavut. Taamaattumik Inuuneritta II-mi ataatsimut periusissiat nangillugit suliareqqissavakka, tamatumani qulakkeerneqassaaq nunatsinni innuttaasut inuunerissaarnissamut sivisuumillu inuuneqarnissamut pitsaanerpaamik periarfissaqarnissaat.

Erseqqinnerusumik oqaatigalugu ingerlatsiviit akimorlugit suleqatigiinneq aallunnerussavara ingerlatsiviit akimorlugit aqutsisut oqallittarfissaannik pilersitsinikkut, tamatumani siunertaassaaq kommunini aqutsisut aamma peqqinnissaqarfimmi, atuarfimmi, politiini allanilu aqutsisut qanimut ataqatigiissakkamillu suleqatigiinnissaat. Tamanna pitsaaliuilluni katsorsaallunilu sulinerup iluani innuttaasunut tamanut iluaqutaasumik ataatsimut iliuuseqarnissamut pingaaruteqarluinnartutut isigaara. Susassaqarfiit akornanni suleqatigiinnerup nakussatsinneqarnera tamatta unamminiakkatsinnik aaqqiinissamut sinaakkutaasunik pitsaanerulersitsissaaq.

Pitsaaliuinerup iluani angajoqqaanngornissamut piareersarnek, MANU, aallunneqarnerulissaaq taamaalilluni sulisut ilinniarsimasut ilaqutariillu imigassaq, naartuneq milutsitsinerlu pillugu oqaloqatigiinneranni sakkusanik peqalerniassammata. Pinngitsuuisinnaajunnaarnermik katsorsaaneq katsorsaavinnillu Allorfinnik sinneruttunik Qeqqata Kommuniani, Kommunimi Qeqertalimmi aamma Avannaata Kommuniani pilersitsineq suli aallutissavakka. UKA2018-imi pinngitsuuisinnaajunnaarnek pillugu inatsit saqqummiutissavara aamma meeqqanik inuusuttunillu katsorsaannissamik neqeroorutit pillugit pilersaarutit oqaasertalersornerat pillugu sulineq nangeqqissallutigu.

Ilinniartitaanermut Naalakkersuisoq peqatigalugu Islandimi periuseq pillugu ilinniarnarujumalluta Islandimut angalanissarput pilersaarusiopara. Suliniuteqarlutik aallarnisaasut suliffeqarfiillu arlallit Islandimi periutsimik atuisut nunatsinni suliniuteqarnissamut isumassarsiorfiginiarlugit pulaassavavut.

Suliniutit aallartinneqarsimasut kissaatigineqartutut sunniuteqarnerisut nalileraangatsigit eqqussinerit pillugit kisitsisit, innuttaasut peqqissusaannik misissuineq atuartullu peqqissusaannik misissuineq suli uuttuinnermi sakkussatut pingaaruteqassapput.

Taamatut oqaaseqarlunga inassutigissavara Naalakkersuisut siunnersuut aamma allannguutissatut siunnersuutip imarisaanik allannguutit ilanngullugit inaarutaasumik akuersissutigissagaat.